



Broj: UP-I-KSI-09-23/22
Datum: 12.05.2023. godine

Na osnovu člana 25. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21), Komisija za odlučivanje o sukobu interesa, postupajući po službenoj dužnosti, u predmetu utvrđivanja povrede odredaba zakona od strane V. B., iz Brčkog, ulica [REDACTED], člana Upravnog odbora JP „Luka Brčko“ d.o.o. Brčko distrikta BiH, kao nosioca javne funkcije, na 55. sjednici održanoj dana 12.05.2023. godine, donosi

RJEŠENJE

- I. **UTVRĐUJE SE** da je V. B., iz Brčkog, [REDACTED], član Upravnog odbora JP „Luka Brčko“ d.o.o. Brčko distrikta BiH, kao nosilac javne funkcije, postupio protivno članu 19. stav (1) i (2) i članu 20. Zakona o sprečavanju sukoba interesa u institucijama Brčko distrikta Bosne i Hercegovine, na način da u Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, nije prijavio pokretnu imovinu bračnog druga, podnesenom dana 05.01.2022. godine Komisiji za odlučivanje o sukobu interesa.
- II. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, V. B. se shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine izriče opomena.

Образложење

Komisija za odlučivanje o sukobu interesa je po službenoj dužnosti Zaključkom broj: UP-I-KSI-09-23/22 od 09.12.2022. godine, pokrenula postupak za odlučivanje o povredi odredaba Zakona o sprečavanju sukoba interesa u institucijama Brčko distrikta Bosne i Hercegovine protiv nosioca javne funkcije V. B., iz Brčkog, ulica [REDACTED], člana Upravnog odbora JP „Luka Brčko“ d.o.o. Brčko distrikta BiH, jer je posumnjala u tačnost i potpunost podataka u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, zbog neusklađenosti između prijavljene imovine u Izvještaju o imovinskom stanju, podnesenom dana 05.01.2022. godine Komisiji od strane nosioca javne funkcije i podataka prikupljenih od nadležnih organa i institucija o pokretnim stvarima

vrijednosti veće od 5.000,00 KM, jer nosilac javne funkcije nije prijavio odnosno unio u Izvještaj o imovinskom stanju pokretnu stvar vrijednosti veće od 5.000,00 KM nosioca javne funkcije, tačnije nije prijavio platu ili naknadu na mjesečnom nivou za bračnog druga i to, naknadu uplaćenu od strane Brčko distrikta Bosne i Hercegovine, isplaćenu tokom 2021. godine, na mjesečnom nivou, u iznosima od 975,00 KM do 2.670,00 KM, ukupne vrijednosti na godišnjem nivou u ukupnom iznosu od 15.237,90 KM, isplaćene u 2021. godini.

Osim toga, uočena je neusklađenost između prijavljene imovine u Izvještaju o imovinskom stanju-Aneks II i podataka dobijenih od strane Odjeljenja za javni registar Vlade Brčko distrikta Bosne i Hercegovine broj: 10-1024ZJ-002/22 od 20.10.2022. godine, u dijelu da nije u Izvještaj o imovinskom stanju unesen pmv. marke Peugeot, tip: C, registarskih oznaka: [REDACTED], godina proizvodnje 2017. vlasništvo J. B., bračnog druga nosioca javne funkcije, a da je vozilo vrijednosti veće od 5.000,00 KM, čime je postupio protivno odredbi člana 19. stav (1) i (2), te odredbi člana 20. Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije je istim zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja zaključka.

Nakon prijema Zaključka o pokretanju postupka, broj: UP-I-KSI-09-23/22 od 09.12.2022. godine, a koji je zaprimljen 23.12.2022. godine, V. B., član Upravnog odbora JP „Luka Brčko“ d.o.o. Brčko distrikta BiH, kao nosilac javne funkcije je dana 27.12.2022. godine dostavio Komisiji za odlučivanje o sukobu interesa pisano Izjašnjenje u kojem, između ostalog, navodi da je njegova supruga J. B. po zanimanju profesor razredne nastave, te je Odjeljenje za obrazovanje Vlade Brčko distrikta BiH po potrebi nastavnog procesa angažuje preko Ugovora o djelu. U vrijeme podnošenja Aneksa II, njegovoj supruzi je prestao radni odnos, nakon čega on nije bio siguran da li da napiše da je angažovana po Ugovoru o djelu ili je na birou za zapošljavanje, iz razloga jer nije znao da li će biti nadalje angažovana za drugo polugodište školske godine. Nadalje navodi, da nije imao nikakvu skrivenu namjeru, da bilo šta sakrije, te je zamolio Komisiju da uvaži njegovo Izjašnjenje.

V. B. je Odlukom broj: [REDACTED] godine imenovan za član Upravnog odbora JP "Luka Brčko" d.o.o. Brčko distrikt BiH, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javnih funkcija i nosilaca javnih funkcija.

Uvidom u Izvod iz matične knjige vjenčanih broj: 12.-000002-4446/2022 od 15.08.2022. godine, u matičnoj knjizi vjenčanih koja se vodi za matično područje Brčko na strani 90., pod rednim brojem 381. za godinu 2021., utvrđeno da je nosilac javne funkcije V. B. dana 20.10.2012. godine, sklopio brak sa J. B. rođ. M..

Nadalje, uvidom u dopis Odjeljenja za javni registar broj 26-001806/22 od 20.10.2022. godine utvrđeno je da putničko motorno vozilo marke: Peugeot, tip: C, registarskih oznaka: [REDACTED], godina proizvodnje: 2017., u vlasništvu supruge, J. B..

U Izvještaj o imovinskom stanju-Aneks II, V. B. je u rubriku „Podaci o bračnom/vanbračnom drugu“ upisao J. B., te je zbog svega navedenog obaveza nosioca javne funkcije unijeti podatke o imovini svog bračnog/vanbračnog druga u Izvještaj o imovinskom stanju.

Članom 22. Poslovnika o radu Komisije za odlučivanje o sukobu interesa propisano je da je stranka u postupku u smislu ovog poslovnika nosilac javne funkcije.

Članom 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da je nosilac javne funkcije dužan u roku od 30 (trideset) dana od dana stupanja na javnu funkciju, podnijeti Komisiji Izvještaj, za sebe i bračnog/ vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, dok je stavom (2) istog člana, između ostalog propisano i da Izvještaj sadrži lične podatke nosioca javne funkcije i članova njegove uže porodice, uključujući JMB, podatke o funkciji koju nosilac javne funkcije obavlja, dok je tačkom b) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM, u Bosni i Hercegovini i inostranstvu.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine, obzirom na to da V. B. nije u Izvještaju o imovinskom stanju podnesenom 05.01.2021. godine Komisiji za odlučivanje o sukobu interesa unio podatke o vlasništvu supruge, bračnog druga nosioca javne funkcije o naknadi uplaćenju od strane Brčko distrikta tokom 2021. godine i podatke navedenog putničkog motornog vozila, čime je postupio protivno odredbi člana 19. stav (1) i (2) te članu 20. Zakona o sprečavanju sukoba interesa u institucijama Brčko distrikta Bosne i Hercegovine.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju u obzir uzela sve okolnosti kako bi izrečena sankcija odgovarala učinjenoj povredi Zakona. Komisija je vodila računa o težini i posljedici povrede Zakona, te činjenici da je V. B., nosilac javne funkcije, predao Izvještaj o imovinskom stanju za 2022. godinu u kojem je upisao podatke o predmetnoj pokretnoj stvari. Nadalje, cijenila je njegovo postupanje i odgovornost, ličnost nosioca javne funkcije, odnos imenovanog prema kršenju odredaba Zakona, opredijeljenost imenovanog da postupi u skladu sa Zakonom, te otkloni razloge koji su doveli do kršenja odredaba Zakona. S tim u vezi, Komisija je poklonila vjeru navodima iz Izjašnjenja od dana 27.12.2022. godine, da nije postojala namjera da sakrije podatke obzirom da ista platu prima preko budžetskih sredstava, te da Direkcija ima podatke o tome. Takođe, Komisija je cijenila i prouzrokovane posljedice nastale predmetnom povredom Zakona, kao i da se očito radi o lakšem obliku kršenja odredaba Zakona koje nisu nanijele štetu integritetu javne funkcije koju V. B. obavlja, te je Komisija stava da izrečena opomena u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 43. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali stranka može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik
Komisije za odlučivanje o sukobu interesa

Admira Mujić, dipl. pravnik

Dostavljeno:

1. [REDACTED],
2. Internet stranici Komisije,
3. Evidenciji i
4. Arhivi.